

書叢本基學國

鈔 詩 宋

(三)

選牧自吳 振之吳 良留呂
校 龔 宣 李

行發館書印務商

書叢本基學國

鈔 詩 宋

(三)

選牧自吳 振之吳 良留呂

校龔宣李

行發館書印務商

屏山集鈔

劉子翬字彥沖。以父幹任授承務郎。辟幕屬。幹死靖康之難。子翬痛憤哀毀。服除。通判興化軍事。以羸疾丐祠。歸隱屏山。學者稱屏山先生。而自號病翁。與籍溪胡原仲。白水劉致中爲道義交。所學深遠。朱子受遺命往遊其門。子翬告以易不遠復三言。俾佩之終身。一日感微疾。卽謁廟。訣別家人。與朱子言入道次第而歿。詩與曾茶山。韓子蒼。呂居仁。相往還。故所詣殊高。五言幽淡卓鍊。及陶謝之勝。而無康樂繁縟細澁之態。則以其用經學不同。所得之理異也。

涼月

涼月未出山。浮雲半空白。徘徊步軒窗。宛若待佳客。經林漏飛輝。映澈生華澤。及茲秋景清。吾廬更幽寂。殊觀發祕藏。妙聽生寥閨。營營息初機。炯炯懷新得。豈無平生心。所樂已非昔。天旋河漢動。夜久鄰機息。淒淒感庭蘭。歲暮霜霰集。呼兒溫濁醪。獨酌醉永夕。

渡淮

鳴榔渡長淮。霏煙散清晨。皎皎初日光。照耀草木新。橫林渡餘碧。疊嶂開嶙峋。移橈失向背。煙波浩無垠。兒童相櫂歌。余心亦欣欣。輕帆互相踰。畫鷁映流津。徘徊望洲渚。悠然獨懷人。樵漁有棲遯。寂寞誰問鄰。

暮風翻洪濤。魚蝦亦有神。四顧天地黑。孤舟恐漂淪。

阻風

晚歲多悲風。江湖浪崢嶸。扁舟渺無依。日暮猶孤征。重岡擁滯霧。迥隔飄浮雲。繫舟古岸邊。纜斷舟復橫。天寒鴻雁稀。滯留知旅情。頽崖震林谷。客子心夜驚。披衣待清曉。缺月西南明。遠遊多所懷。益遣歸思盈。

建康六感

吳

龍翔大耳兒。虎視捉刀人。風雲競追逐。逸軌誰能遵。大皇負英材。沈潛歛求伸。一呼定南國。再戰威強鄰。坑魏旣搖岳。攘劉亦披鱗。組練繞平隰。艤艫蔽通津。偉哉人物盛。成功豈無因。代祀已飄忽。風流久彌新。停橈眺迥陸。裂蔓登層闔。臥龍昔來遊。萬古懷清塵。

晉

日昃無全照。南遷事倉忙。龍謠方協瑞。星禍已告亡。淩遲百年運。凜凜危莫將。向來問鼎人。項背相望。環宮白羽列。面闕鳴弦張。膺圖未躋泰。卜世豈在長。獨憐短轅公。推刃殺忠良。百身嗟莫贖。一慟鬢成蒼。時移事亦更。爲宋復爲梁。惟有采石潮。年年到前岡。

宋

寄奴真偉人。落拓龍潛地。據筵呼五木。已有吞世氣。世期值陽九。天綱日淪替。偏邦或跨州。卑號猶稱帝。匪乘艱棘運。英姿疇能濟。南戡奠番禺。西狩澄涇渭。功雖與世隆。道亦因人廢。緬懷揖讓風。黃屋身如寄。頽波日奔迫。夜壑遷神器。巢由獨賢哉。高蹤邈難繼。

齊

堯宮不剪茨。禹室無崇壤。巍巍天步隆。萬代猶可仰。荒哉二三君。經營務華敞。落枿滿清江。飛斤殷遙響。疏淵引瀾澳。築圃遷林莽。筋力斃民軀。貲財傾國帑。雄心獨未倦。矯首生遐想。時徂陵谷變。無事猶悲曩。殷憂易興懷。逸樂難終享。過客問青樓。荒哇棘一作雜花長。

梁

開圖屬英睿。失國由昏懷。斯人異前修。撥亂旋致亂。輕刑下益肆。厚爵臣彌叛。聰明馳萬機。精苦徒宵旰。鳳冕敬方袍。鸞旗游彼岸。悠然弃從懷。臨機復難斷。那知千佛力。不紓一寇難。酒色覆商周。神仙蕩秦漢。趨亡固多軌。荒迷卒同貫。微聖常鮮終。撫冊三慨嘆。

陳

悲風嘯荒垣。歌斷庭花曲。璧月夜沈輝。瓊樹春銷馥。郊圻遊從盛。想像猶經目。麗景明新妝。清波映鮮服。承恩屬令姿。被選皆華族。朝從結綺遊。暮向臨春宿。意高時忽謝。步遠塗方促。榮華事不長。哀樂情難足。

悠悠六朝事。轉盼風驚燭。永懷興亡端。斯文慚麗縵。

夜飲

良宵樂未央。促席團鸞坐。佳人意慇懃。唱歌屬余和。幽期貴闊略。醉語多叢脞。沉沉玉卮酒。量淺難負荷。豈不懷極懽。恐重賓友過。褰帷望明河。山月銜半破。回軒互追奔。傘涕簷瓦墮。

遊朱劬家園

晨暉麗丹楹。翼翼侔帝居。向來堂上人。零落煙海隅。聯翩際時會。振迹皆刑餘。閨帷尙帝主。阜隸乘軒車。流威被東南。生殺在指呼。樓船載花石。里巷無袴襦。至今江左地。風雲亦嗟吁。叨榮已過量。受禍如償逋。荒涼當門路。尙想冠蓋趨。客舸維岸柳。鄰人罾池魚。徘徊極幽觀。曲折迷歸途。夜月扃綺戶。春風散羅裾。繁華能幾時。喪亂實感予。曹鄴予何譏。此曹眞人奴。

早行

村鷄已報晨。曉月漸無色。行人馬上去。殘燈照空驛。

老農

山前有老農。給我薪水役。得錢徑沽酒。醉臥山日夕。忘形與之語。妙理時見益。志士多隱淪。欲學慚未識。種菜

傍舍植柔蔬。攜鉏理荒穢。桔槔勤俯仰。一雨功百倍。朝來綠映土。新葉搖肺肺。牛羊勿踐畦。肉食屠爾輩。晨興

晨興訪蕭寺。爽氣清如沐。坐看雨離山。飛陰斷平陸。歸途阻夕漲。竚立驚幽獨。曳杖聽殘鐘。卻寄僧坊宿。下灘作

青山鎖連環。白澗走鳴瀨。迷津毫髮間。舟與危石會。回淵聚浮沫。斷壁餘澎湃。玩奇心若驚。覽鏡自不逮。悠然一回首。孤驛已茫昧。停橈念經歷。履地猶旋憤。悲風嘯枯林。暮野雲相蓋。隔船聞和歌。沽酒慰疲怠。棄竹夫人

愛憎情易遷。感物思鬱紆。念昔未棄捐。嘗侍君子居。煩襟一披豁。雅抱何清虛。蹉跎怨時暮。涼德意見疎。飛霜皓中庭。枵然委牆隅。的皪珠幃深。熒煌錦茵鋪。豈不懷舊恩。君心已非初。當年紈扇謠。抱恨同區區。秋懷

哲人嘆逝川。志士悲廩秋。流光不暫停。忽忽歲欲周。涼颼襲迥野。飛霜皓盈疇。華林失鮮輝。奔谿殺湍流。萬化儻日徂。吾生難獨留。而我苦不樂。彷徨復何求。世途多軌轍。今行非昔謀。徒遵耿耿意。齟齬固莫投。時乎不再來。豈余敢懷尤。王道炳日星。歷聘疲軻丘。歸歟既改旆。浩然亦回輈。寂寞寧子歌。棲遲長卿遊。客嘲徒自解。天問終不酬。長揖未免烹。說難竟遭囚。行藏或大謬。聖賢共悠悠。含思疚恆積。念往川途修。

煌煌青春姿。蹉跎恐茲由。諒非宏達觀。那能齊百憂。

四不忍

草邊飛騎如煙滅。拉獸摧斑食其血。此時疾首念變興。玉體能勝饑渴無。危城屑麴驚雲擾。簾簾無光天
座杳。奮戈儻未雪深讐。我食雖甘何忍飽。
黃河鑿鑿冰成路。人語寒空氣成霧。此時泣血念變興。玉體能勝凜冽無。蒼皇天步蒙塵去。晝夜飄零傷
歲暮。飛書儻未伐姦謀。我服雖華何忍御。
平沙月轉旌旗影。擐甲爲衾戈作枕。此時飲恨念變興。玉體能勝暴露無。問安使者空相繼。清蹕不回宮
殿閉。請纓儻未縛酋渠。我榻雖安何忍寐。
漁陽疊鼓風沙戰。潑水淋漓舞胡旋。此時太息念變興。玉體能勝寂寞無。六宮遭亂多奔迸。不復梨園歌
舞盛。著鞭儻未蹂龍庭。我瑟雖調何忍聽。

望京謠

雙鑾北狩淹歸轂。寂寞梁園春草綠。猶傳故老守孤城。官軍不到黃河曲。連雲樓櫓已灰燼。更倚窗扉防
箭鏃。招兵大半出羣盜。繡褕蒙衣屢翻覆。前宗後社力誅鉏。白刃如霜挂人肉。州橋燈火夜無光。夾道狐
狸晝相逐。往時汴泗絕行舟。市糴十千塵滿斛。衣冠避胡多在南。胡馬却食江南粟。謀臣武士力俱困。海

角飄搖轉黃屋。盤庚五遷方擇利。昆陽一戰何當卜。寧聞犬豕亂中華。漢祚承天終必復。夕烽明處望千門。孤臣祇欲吞聲哭。

臨池歌

劉致思倦遊。復臥故廬。有意學書。來求石刻。因慨然念昔經行秦洛趙魏間。未嘗不回驂駐軫。搜訪古迹。故宮遺址。豐碑斷碣。歷歷相望也。吹埃剔蘚。考年代之所志。訂古驗今。識興衰之所自。至乃壞墉荒榛。微陽霧雨。雖暴露霑沐。僮僕色難。而余躊躇不忍去也。奇蹤偉筆。多致墨本。甚者缺裂模糊。不可辨了。亦皆摸脫以歸。登登之聲。殷乎山谷。歸所獲。車載牛負。不可勝計。喪亂以來。汎掃焚。何止七厄哉。今披篋視之。十得一二。有副本者。以與致思。致思明爽。嘗留心字學。運筆流快。風動草偃。固足以軒輊流輩。然未能窺古人藩域者。功虧一簣耳。夫洞石仆木。非蹶張挽強者所能。用志不分。乃凝於神。梓慶削鐻。狗瘻承蜩。皆此道也。致思充是而學焉。余不知其所至矣。因作臨池歌。以堅其志。切切惓惓。亦朋友之義也。

君不見鍾繇學書夜不眠。以指畫字衣皆穿。當時尺牘來鄴下。錦標玉軸爭流傳。又不見魯公得法屋漏雨。意象咄咄凌千古。斷碑零落翠苔封。直氣英風猶可覩。元常獨步黃初際。清臣後出今無繼。風神迥處出。一作本天資。巧力亦自精勤至。羨君好尙何高奇。寒窗弄筆手生胝。向來失計墮塵網。銳氣直欲摩雲飛。

男兒舌在心何忤。卻擬臨池尋舊學。要須筆外見鍾顏。會自蛟龍生掌握。銀鈎石刻余何愛。勸以短歌君勿怠。他時八體妙有餘。此歌儻可君紳書。

和李巽伯春懷

山寒古寺清。斷續春朝雨。遙憐遠客情。寂寞誰晤語。平生氣軒昂。失意今易與。有酒卽佳晨。無兵皆樂土。微吟對節物。林靜幽花吐。悠悠念鄉邑。耿耿悲豺虎。知有濟時才。從橫在談麈。功名恐未遲。老翮期更舉。

明皇九馬圖

書生兀兀園不窺。見馬豈辨騮與騅。開圖九駿立突兀。摸擦知是真龍兒。奔雷蹴踏原野動。曳練慘錯風沙隨。華纓金絡豈不好。矯首奮迅那容羈。吾聞取驥如擇士。競愛妥帖驚權奇。士懷倜儻衆論斥。馬有顛頓羣驚欺。六閑象養固恩厚。橫氣摧折常鳴悲。丹青儻不逢妙手。萬世豈識真龍姿。因思中原政格鬪。鐵騎倏忽銀山移。著鞭安得致此物。掩畫四顧徒歔歔。

怨女曲

空原悲風吹苜蓿。胡兒飲馬桑乾曲。誰家女子在氍毹。嗚嗚夜看星河哭。黃金爲閨玉爲宇。平生不出人稀覩。父憐母惜呼小名。擇對華門未輕許。干戈漂蕩身如寄。綠鬢朱顏反爲累。朝從獵騎草邊遊。暮逐戎王沙上醉。西鄰小姑亦被虜。貧賤思家心更苦。隨身只有嫁時衣。生死同爲泉下土。出門有路歸無期。不

歸長愁歸亦悲。女身軟弱難自主。壯士從姑不如女。

巡寨偶書

窮寇轉趨海。吾邦備宜先。連年戍役頻。徵兵及漁佃。扶戈或稚齒。嬰冑仍華顛。未知戎伍肅。朱旗亂長阡。杯端晚燧發。石際飛梯懸。崎嶇樵牧地。萬竈生浮煙。我行視營柵。兒戲端可憐。倚茲形勢險。寇至常遷延。羣兇昔吾軍。赤指抨鳴弦。防胡屢瓦解。合寇俄星連。猶多燕趙兒。意氣非當年。駟車載珍寶。結騎馳嬋娟。時危天稔亂。事豈汝能專。怒風飛驚濤。河梁失歸船。四顧天地黑。攬衣思茫然。

負暄

宵寒臥增裯。晝寒起增衣。何如負暄樂。高堂日暉暉。引光扉盡闢。追影榻屢移。妙趣久乃酣。瞑目潛自知。初如擁紅爐。凍粟消頑肌。漸如飲醇醪。暖力中融怡。欠伸百骸舒。爬搔隨意爲。稍回驕佚氣。頓改酸寒姿。薰然沐慈仁。天恩豈余私。願披橫空雲。四海同熙熙。矯首望扶桑。傾心效園葵。

木犀古風

化工吝幽香。斑斑被花木。氤氳寒巖桂。高韻蓋羣馥。無人盡日芳。守志何幽獨。士介耻求知。女貞慙自鬻。淒涼楚山秋。樛枝吐金粟。淺水映輕明。微颺發含蓄。樓端靜忽聞。馬上遙相逐。踟躕爲延佇。但見林巒綠。餅罌誰折贈。清芬闔廬屋。久處不自知。乍至彌鬱郁。客悲芳歲暮。夢遠寒溪曲。長吟小山詞。古意恐難復。

食蠣房



蠣房生海壖。堅頑宛如石。其中儲可欲。雖固必生隙。嵌巖各包藏。礧礧相附積。中逢霹靂手。妙若啓局鏘。鑽灼諒難堪。曷不吐餘瀝。南庖富腥盤。豈惟此稱特。吞航大絕倫。梯巒萬夫食。針鱗九牛毛。小嚼逾千百。光螺暈紫斑。蜆膏湛金色。水母脆鳴牙。章舉懸疣密。烏黏力排募。貼石不可索。妾魚戲浮波。媚鮓雌雄匹。蟹躁輒橫鶩。竈縮常畏出。車螯不服箱。馬蛟非駿迹。江瑤貴一柱。嗟豈棟梁質。骨柔競愛饒。多鯁鋤乃斥。蚶虹鮭亦文。肉黑魚之賊。鰕鱮鯉鯪。鱸鮓鰱魴鯽。鱮庸而釀小。瑣穴難盡述。包涵知海量。長養荷天德。貪生族類繁。失地波濤窄。網罟人創禍。甘鮮已爲厄。紛然均可口。流品當剔白。微物倘見知。捐軀不足惜。

諭俗十二首

故園喪亂餘。歸來復何有。鄰人雖喜在。憂悴成老叟。爲言寇來時。白刃穿田畝。驚忙不知路。夜踏人屍走。屋廬成飛煙。囊橐無暇取。匹夫快恩讎。王法誰爲守。艱難歷冬夏。遷徙徧林藪。深虞邏寇知。兒啼扼其口。樹皮爲衣裳。樹根作糧糗。還家生理盡。黑瘦面如狗。語翁翁勿悲。禍福較長久。東家紅巾郎。長大好身首。荒荒死戰場。頭白骨先朽。

西村人漸歸。撻拄燒殘屋。東村但蒿萊。死者無人哭。昔茲號富穰。被禍尤殘酷。二三里中豪。喪亂身爲僇。遺骸悵莫掩。飢鳶啄其腹。豈無平生時。意氣凌鄉曲。錐刀剝微利。舞智欺惇獨。錦囊收地券。奕葉相傳續。

只今鄰叟耕。歲歲輸官穀。爾曹何顯愚。人生固多欲。

何州無戰爭。閩粵禍未銷。或言殺子因。厲氣由此招。蠻貊地瘠狹。世業患不饒。生女奩分貲。生男野分苗。往往衣冠門。繼嗣無雙髻。前知飲啄定。妄以人力僥。三綱旣自絕。餘澤豈更遙。王化久淘漉。刑章亦昭昭。那無砥憤慈。恩勤愧鴟鴞。冤報且勿論。茲義古所標。

愚氓擾潢池。難難亦常態。簪紳有包藏。事異吁可怪。豺聲久伺亂。鯨鯢終何悔。游言張兇焰。巧譟移機會。初如卵殼微。趾踐悉糜碎。養成羽翮雄。飛掣韝繩外。剪鉏淹歲月。螫毒彌疆界。向來詰端由。罪白不容蓋。南冠囚載路。東市誅其最。隆寬俗與新。僥倖汝勿再。

野人厭羹藜。家有庖丁刀。徒誇批導手。肯念耕稼勞。隱然肉山雄。畏彼尺箠操。春泥臥寒野。夜月犁東臯。辛勤力已盡。穀蕪禍豈逃。誰無惻隱心。鮮能勝貪饕。蓋帷猶示恩。況異犬馬曹。

扇馬嚴內仗。貂璫侍宸闈。哀哉里閭間。刁閹逮雞豚。放麇識忠藎。母卵著格言。矧利肥甘軀。絕其孳息源。難銷愛欲心。物物天性存。逆情氣必戾。順化生乃蕃。誰開口腹謀。無乃傷仁恩。

粵人多悍驕。風聲亦惟舊。兒童僅勝衣。挾箠相格鬪。藝精氣益橫。質化心忘陋。家饒喜稱俠。世亂甘爲寇。豈伊天性然。習俗所成就。吾聞互鄉童。翺翔聖賢囿。隱豹弄爛斑。攻駒發馳驟。佩觿爾何知。義方得無謬。村南井欲乾。曉汲盈瓢濁。飲濁不足言。奈此田畝涸。咿啞龍骨響。煥爛陽烏虐。良農無他營。辛苦事東作。

春苗何葱芊。秋刈何稀薄。我雖食有餘。念彼心不樂。乞靈走羣祀。晚電明霍霍。屯膏竟未施。天意自難度。震雷霹枯松。頑龍失其據。浮雲三日雨。盈畝復地注。商羊舞未休。早魃消何遽。稍寬人心切。仰荷天恩布。稻畦覆連顛。援穗給朝飮。菜畦擢新萌。蕩滌死羣蠹。歲儉民怨咨。時豐家悅豫。青青寒莠色。亦復貪雨露。茲鄉山水佳。昔乃爲盜窟。吾廬已煨燼。荒草牆兀兀。牆東大梨樹。惟此爲舊物。火燒枝葉盡。老本更奇崛。衆鳥罷高棲。空庭失清樾。鄰兒利薪爨。往往肆戕伐。豈知昂霄勢。長養自毫末。寒堤孤確在。廢圃鳴泉出。衝茅且經營。霜霰莫倉猝。

未須葺吾廬。且復修吾倉。求安當卜居。求飽當聚糧。營生力有限。先此計頗長。去年稻盈畦。避寇不得將。新芽雨後白。臥穗霜中黃。鰥惻有饑色。寇釁餘稻梁。解衣易升斗。糠粃隨風揚。休嗟昔艱難。喜茲歲豐穰。鄰翁爲人耕。貯粟不盈箱。溪頭廩與困。纍纍已相望。

縣牆挂德音。盡弛今年租。旄倪發懽謠。助達和氣舒。皇恩施甚厚。疲瘵望少蘇。吁嗟吏舞文。詔紙墨未渝。借貸盡白著。勾稽窮宿逋。培克儻歸公。民貧猶樂輸。量權徵倍耗。貪緣竊其餘。寧逢盜剽攘。厭聞吏追呼。盜姦久必戢。吏姦無由鉏。雷霆不言威。肉食忍自誣。故態勿狃習。窮閭勿浸漁。勿謂天聽高。勿謂黔首愚。

清江行

漁翁一棹老清波。稚子學語能漁歌。日暮沙頭寒燕竹。雨餘船角亂堆簑。鸞殘小鮮仍自鱸。湖海茫茫醉

鄉內夜闌酒渴漱寒流。月照蘆花上簷背。

聽詹溫之彈琴歌

鳴琴藝精非小道。可惜溫之今已老。玲琅一鼓萬象春。鐵面霜髯不枯槁。自言寡知音。求我爲作歌。號宮韻角可聽不可狀。錦腸繡舌空吟哦。吾意其一氣之濁清。兩曜之晦明。山河之結融。雷霆風雨之震驚。包羅具七絃。開闔造化由人心。又疑夫堯禹之躬行。丘軻之立言。瞿聃之同歸。百家諸子之紛然。更歷千萬古。此意不滅絲桐間。滌除浮慮清。蕩摩愁襟開。琴之氣象廣莫有如此。欲媚俗耳知難哉。寒缸燒涸夜向闌。罷琴歸矣我欲眠。夢跨冰輪出瑤海。一笑碌碌瀛洲僊。

雲際會劉到致中

紅綃千樹桃。雪縠萬株李。柘葉青青如鼠耳。橫山渡口浪成堆。認得劉郎船子來。物情時事不須說。且喜新歲同銜杯。少年鼻哂輕流俗。斂銳收豪今碌碌。敝裘常帶客塵縑。雙鬢不如春草綠。東風吹愁入我心。使成嘯嘆成悲吟。問君底事久留此。曷不聯鑣歸故林。

懷舊歌

黃茅生煙暗村落。浩歌無復當時樂。鄰家酒熟逆鼻香。一醉乾坤墮冥漠。尋芳屢過垂玉軒。叉魚夜上浮清閣。鬪牌擊鼓多伎倆。我獨旁觀惟大噓。驚烽入座懼難保。幸得身存他勿道。吾宗潛武臥空棺。衰臣兄

弟埋荒草。當時醉舞向花下。綠鬢朱顏各鮮好。隙駒風燭尙須臾。數子凋零不待老。死生細事從渠天。莫學兒女相哀憐。一窗容膝可終隱。寇盜擾擾今連年。王師誅鉏有漏網。死灰焰焰猶思然。憂煎過計祇自惱。且但努力耕吾田。

夜過王勉仲家宿酒數行爲作此歌

遙林帶雪迷村曠。伶俚一馬行無伴。故人家住丁坂頭。停驂邂逅成清款。犯寒知我猶空腹。地爐然薪架紅玉。花盜湯酒欲生香。竹外庖廚開剝肉。夫君不有中饋賢。咄咄辦此何神速。酒酣意氣悲荊棘。尙憶朱薨舊時宅。豺狼得志竟何成。至今人骨如霜白。亂離少有闔門在。漂蕩俄驚五年隔。數畝荒田已失耕。一間茅屋仍留客。客情主意懼難盡。短臘窮冬春欲近。明朝分手更愁人。且覆清觴莫留贖。

夏日吟

君不見長安公侯家。六月不知暑。扇車起長風。水檻瀝寒雨。重欄邃屋晝生陰。反易天時生談吐。又不見武陵富豪兒。炎天多快意。雪穀曳輕明。珍饈嚼甘脆。蛾眉皓齒發清歌。灑酒筠枝集蠅蚋。何如野客歌滄浪。萬事不理心清涼。流金礪石未爲苦。勢利如火焚中腸。

海棠洲

煌煌海棠洲。錦樹臨清灣。常恨灣頭風。吹花走潺湲。潺湲去不息。花亦無由還。

懷新亭

茅簷入竹低。曠野時寓目。寂寂農家春。新秧滿田綠。何時稻登場。秋山響蓬櫟。

宴坐巖

青青槐樹林。下蔭蒼蘚石。幽人宴坐時。懷抱忘其適。不見暮樵歸。寒山雨中碧。

南溪

聊爲溪上遊。一步一回顧。悠悠出山水。浩浩無停注。惟有舊溪聲。萬古流不去。

兼道攜古墨來。墨面龍紋。墨背識云。保太九年。奉勅造長春殿。供御龍印香煤。旁又識云。墨務官臣庭邽。監官臣夷中。臣子和。臣卞等進。蓋江南李氏物也。感之爲作此詩。

長春殿古生荆蒼。猶有前朝遺物在。錦囊珍重出玄圭。雙虬刻作蜿蜒態。枯皮剝製弄幾刳。斷玦精堅磨不殺。吾聞李氏據江左。文采風流高一代。當時好玩不獨此。器用往往窮奢汰。徵工選技填御府。不惜千金爲賞賚。治兵唐推英衛精。治民漢許龔黃最。惜哉取士不知術。妙手獨得庭邽輩。真主驅馳八極中。荒王逸樂孤城內。汗青得失更誰論。尤物競爲人寶愛。嗟余視此真糞土。事有至微猶足戒。投文欲往吊江流。幽魂未泯應慚悔。

劉兼道獵